

Ni Pangulong
Dieter F. Uchtdorf
Ika-duhang Manuglaygay sa
Unang Panguluhan



Isa ka Daku nga Buluhaton sang Dios

Abril 6, 1830

May siento otsenta na ka tuig ang nagligad, sanday Joseph Smith, Oliver Cowdery, kag ilisipon nga iban pa ang nagtililipon sa pag-organisar sang Ang Simbahan ni Jesucristo sang mga Santos sa Ulihing mga Adlaw. Sa pagkamatuod, isa yadto ka simple apang espirituhanon nga miting. Ginsulat ni Joseph nga pagkatapos sang sakramento, “ginbubo sa amon ang Balaan nga Espiritu sing di-hamak—nga ang pila nagpanagna, samtang ginadayaw namon tanan ang Ginuo, kag nagkalipay sing lubos.”¹

Ang mga hitabo sa sining adlaw naglabay lang nga wala matalupangdan sang kalibutan; wala ini masulat sa mga pahayagan ukon mapahayag man lang sa kalibutan. Bisan pa man, daw ano ayhan ang pagkalipay sang mga kalangitan kag paghimaya sa Dios—kay sa sina nga adlaw, ang Simbahan ni Jescristo nagbalik na sa duta!

Solomon Chamberlain

Sugod sina nga adlaw tubtob sa karon, minilyon ka mga napun-an sang pagtuo nga kaanakan nga lalaki kag babayi sang Amay nga Langitnon ang nagsunod sang mga pagpabatyag sang Balaan nga Espiritu kag nagpatugmaw sa sagrado nga mga tubig sang pagbunyag. Isa sadto amo si Solomon Chamberlain.

Si Solomon isa ka espirituhanon nga tawo kag naghinguyang sang madamo nga mga inoras sa pag-pangamuyo, nga nagahangad sang kapatawaran sang iya mga sala kag pag-ampo sa Amay nga Langitnon sa pagtuytoy sa iya sa kamatuoran. Sang mga 1816, ginpanaad kay Solomon sa isa ka palanan-awon nga maabtan pa niya ang adlaw sang pagtukod sang Simbahan ni Cristo pagkatapos nga ang organisasyon sang Napulo'g Duha ka mga Apostoles mapahamtang liwat sa duta.

Makaligad ang mga tinuig nagbiyahe si Solomon sakay sa barko nga pakadto Canada sang ang iya ginasakyen naghapisit sa magamay nga banwa sang Palmyra, New York. Didto iya nabatyagan ang isa ka di-mapunggan nga puwersa nga nagasudyot sa iya sa pagpanao sa barko. Bangod kay wala makahibalo kon ngaa didto sia, nagsugod sia sa pagpakighambal sa mga tawo sa banwa. Wala gid man madugayi kag iya nabatian ang istorya parte sa isa ka “bulawan nga Bibliya.” Siling niya yadtong duha ka mga tinaga nagdala sang “gahum nga daw kasubong sang kuryente [nga] naglatay halin sa tuktok sang akon ulo pakadto sa punta sang mga tudlo sang akon mga tiil.”

Ang iya mga pagpangusisa nagdala sa iya sa balay sang mga Smith, sa diin nakigsugilanon sia sa ila didto parte sa makadalayaw nga mga balita sang

ginpanumbalik nga ebanghelyo. Pagkatapos sang duha ka adlaw nga pagtiner didto kag pagbaton sang panaksihon parte sa kamatuoran, nagpadayon si Solomon sa pagbiyahe pakadto sa Canada, dala ang 64 ka bag-o nga gin-imprinta, kag wala pa mahugpong nga mga pahina sang Ang Libro ni Mormon. Bisan sa diin sia magkadto, iya gintudlo sa mga tawo, “alangay sa mataas kag manubo sing estado sa sosyedad, maggaranon kag kubos, . . . nga maghanda para sa daku nga buluhaton sang Dios nga manug-abot na sa karon.”²

Isa ka Daku nga Buluhaton sang Dios

Sugod sina nga adlaw sang Abril 1830, minilyon ang nakadiskubre sang kamatuoran sang ginpanumbalik nga ebanghelyo kag nagpatugmaw sa mga tubig sang pagbunyag. Nagasaki ako nga ining “daku nga buluhaton sang Dios” yari na karon sa duta. Nagapamatuod ako nga ginabantayan sang Ginuo ang Iya Simbahan kag ginadumala ini paagi sa Iya propeta nga si Pangulong Thomas S. Monson. Indi isa ka ordinaryo nga bugay ang mabuhi sa sining ulihing mga adlaw. Mahimayaon ining panahon, nga nakita na sadto pa sang dumaan nga mga propeta kag gin-updan sang mabinantayon, makaanghel nga mga panong. Ang Ginuo nagaunikid sa Iya Simbahan. Nagaunikid man Sia sa ila nga, pareho kay Solomon Chamberlain, nagaunod sa mga pagpabatyag sang Balaan nga Espiritu kag nagabuyllog upod sa ila mga kautoran sa bug-os nga kalibutan sa pagpahanabo sining daku nga buluhaton sang Dios.

MGA TANDA

1. Joseph Smith, *sa History of the Church*, 1:78.
2. “A Short Sketch of the Life of Solomon Chamberlain,” typescript, Librarya sang Maragtas sang Simbahan (sa Internet sa www.boap.org/LDS/Early-Saints/SChamberlain.html); tan-awa man sa William G. Hartley, “Every Member Was a Missionary,” *Ensign*, Sept. 1978, 23. Pila ka adlaw pagkatapos sang pag-organisar sang Simbahan, ginbunyan si Solomon Chamberlain ni Joseph Smith sa mga tubig sang Seneca Lake, New York.

PAGTUDLO GIKAN SA SINING MENSAHE

Ang personal nga halimbawa amo ang isa sa pinakagamhanan nga mga pamaagi sa pagtudlo nga may yara kita” (*Teaching, No Greater Call* [1999], 18). Sa inyo pagpaambit sang istorya ni Solomon Chamberlain, agdaha ang pamilya sa pagpanumdom sang mga tinion nga iya ginsunod ang mga pagpabatyag sang Espiritu. Hambali kon paano ayhan nakabulig sa iban ang iya

halimbawa. Agdaha ang mga miyembro sang pamilya sa pagpaambit sang tion nga ang maayong halimbawa sang iban nakabulig sa ila.

LAMHARON

Eksperimento sa Akon Pagtuo

Ni Jason Young

Sang 13 anyos pa lang ako, ginsuguran ko na ang pagbasa sang Ang Libro ni Mormon adlaw-adlaw kag ginbugayan ako sa tagsa ka adlaw sumugod sadto.

Ang amon klase sa Sunday School para sa mga 13 ka tuig medyo magahod. Ugaling, may isa kami ka dalayawon nga titser nga nagtinguha gid sa pagtudlo sang tagsa ka leksyon paagi sa Espiritu. Isa sadto ka leksyon amo ang parte sa pagbasa sang balaan nga mga kasulatan.

Sa katapusan sang leksyon ginhataagan niya kami sang isa ka hangkat. Gintuyo gid yadto para sa amon tanan, apang kon sa ano nga rason nga iya ako gintulok sing direkta sang sia nagsiling, “Ginahangkat ko kamo nga magbasa sang Ang Libro ni Mormon sa tagsa gid ka adlaw!” Ginpensar ko sa akon kaugalingon, “Ipakita ko sa imo. Himuong ko ina!”

Nagsugod ako sa 1 Nefi kapitulo 1 sina gid nga gab-i kag nagpadayon sa pagbasa adlaw-adlaw. Daw wala ako sa husto nga panimuot sang magsugod ako, apang sang ulihi nanamian na ako sa akon nabatyagan kon ako magbasa sang Ang Libro ni Mormon. Ang pagbasa sa tagsa ka gab-i akon na nalingawan.

Pagkaligad sang binulan nakalab-ot na ako sa Alma 32 kag nagdayaw gid sa ideya parte sa isa ka eksperimento sa pagtuo. Sa eskuwelahan bag-o pa gid lang namon matun-an ang parte sa paghikot sang mga pag-eksperimento sa siyensa, gani nagluhod ako kag naghambal sa Amay nga Langitnon nga sugoran ko na ang eksperimento. Nangabay ako nga akon mahibaloan kon bala Ang Libro ni Mormon matuod.

Sa pagdumdom sadtong inagihan ko, nakahibalo ako nga ginsabat sang Amay nga Langitnon ang akon mga pangamuyo sing madamo na nga beses. Ang adlaw-adlaw nga pagbasa sang Ang Libro ni Mormon naghatag sa akon sing dugang nga kapasidad nga madaug ang kalainan. Nabatyagan ko nga nangin

mas malapit ako sa akon Amay sa Langit. Nabatyagan ko nga ginpabakod ako sang gahum sang Balaan nga Espiritu agud malampuwasan ang mga kabudlayan. Matuod ang ginhambal ni Alma parte sa pag-eksperimento sa pulong sang Dios: "Ini nagasugod sa pagpadako sang akon kalag; huo, ini nagasugod sa pagpasanag sang akon paghangop, huo, ini nagasugod nga mangin manamit sa akon" (Alma 32:28).

MGA KABATAAN

Indi Ordinaryo nga Bugay

Ang Simbahan gin-organisar 180 ka tuig na ang nagligad sini nga bulan. Si Pangulong Dieter F. Uchtdorf nagsiling nga "indi ordinaryo nga bugay" ang

mabuhî karon nga panahon, nga ang Simbahan ginpanumbalik na. Para makita ang pila sang dalagku nga mga bugay nga ginhatag sang Amay nga Langitnon sa mga tawo paagi sa Simbahan, tan-awa sa balaan nga mga kasulatan sa idalom.

Mga Binuhatan 22:16

2 Nefi 32:5

Santiago 5:14–15

1 Nefi 9:3–11

Amos 3:7

1 Nefi 9:3–10

© 2009 iya sang Intellectual Reserve, Inc. Tanan nga kinamataraong ginahuptan. Ginbalhag sa Pilipinas. Petsa sang pagtugot sa Ingles: 6/09. Petsa sang pagtugot sa paglubad: 6/09. Linubad sang *First Presidency Message, April 2010*. Hiligaynon. 09364 861

Paghangad kag Pagbaton sang Personal nga Rebelasyon



Itudlo ining balaan nga mga kasulatan kag sinambit nga mga pulong ukon, kon kinahanglanon, isa pa ka prinsipyo nga magabugay sa mga utod nga babayi nga inyo ginabisita. Magpanaksihon parte sa doktrina. Agdaha ang inyo mga ginabisita nga magpaambit sang ilanabatyan kag natun-an.

Paano Ako Maghangad sang Personal nga Rebelasyon?

Ginahandaan naton ang pagbaton sang personal nga rebelasyon subong man sang mga propeta, paagi sa pagtuon sang balaan nga mga kasulatan, pagpuasa, pagpangamuyo, kag pagpalambo sang pagtuo. Pagtuo amo ang yabi. Dumduma ang paghanda ni Joseph para sa Unang Palanan-awon:

“Kon may yara sa inyo nga nakulangan sing kaalam, papangayo sia sa Dios. . . .

“Apang papangayo sia nga may pagtuo, sa wala'y pangduhaduha.”¹

Elder Robert D. Hales sang Korum sang Napulo'g Duha ka mga Apostoles.

“Ang pangamuyo amo ang inyo personal nga yabi pakadto sa langit. Ang kandado yara sa inyo nga bahin sang tabon.

“Apang indi lang ina. Sa isa nga nagapensar nga ang rebelasyon ginahatag lang nga wala

ginatinguahan, ang Ginuo nagsiling:

“Wala ka makahangop; nagpensar ka ayhan nga ihatag ko ini sa imo, kon wala ka man lang sing ginahimo luwas nga magpangayo sa akon.

“Apang, yari karon, nagasiling ako sa inyo, nga tun-an ninyo ini sa inyo *kaisipan*; kag mamangkot kamo sa akon kon ini matuod, kag kon ini matuod makabatyag kamo sing komfirmasyon sa inyo; gani, kamo *makabatyag* nga ini matuod.”²

Pangulong Boyd K. Packer, Pangulo sang Korum sang Napulo'g Duha ka mga Apostoles.

Paano Ako Makabaton sang Personal nga Rebelasyon?

“Sa iya sini mas pamilyar nga mga pamaagi, ang rebelasyon ukon inspirasyon nagaabot paagi sa tingug sang Ginuo ukon mga pamensaron nga ginapabutyag sa kaisipan (tan-awa sa Enos 1:10; D&C 8:2-3), paagi sa hinali nga kasanagan (tan-awa sa D&C 6:14-15), paagi sa positibo ukon negatibo nga mga balatyagon parte sa ginatanyag nga mga pagpili, ukon bisan pa gani paagi sa mga inspirado nga pagpasundayag, subong sa mga pagpasundayag sa arte. Subong nga si Pangulong Boyd K. Packer, . . . Pangulo sang Korum sang Napulo'g Duha ka mga Apostoles,

MGA BULIG PARA SA VISITING TEACHING

Bilang isa ka visiting teacher, sarang ka makabaton sang mga pagpabatyag sang Espiritu parte sa mga pangnahanglan sang imo kautoran nga mga babayi kag kon paano mo matigayon yadtong mga pangnahanglan. Sa imo pagtudlo sining mensahe, ipaambit, kon nagakabagay, ang bisan ano nga inspirasyon ukon bulig nga imo nabaton parte sa visiting teaching.

PERSONAL NGA PAGPANGHANDA

- 1 Samuel 3:10
- 1 Mga Hari 19:11-12
- Alma 5:46; 26:22
- 3 Nefi 19:19-23

nagpabutyag, ‘Ang inspirasyon masami nagaabot bilang balatyagon sangsa tingug.’”³

Elder Dallin H. Oaks sang Korum sang Napulo'g Duha ka mga Apostoles.

“Ang templo isa ka balay-tulun-an. Kadam-an sang mga instruksyon nga ginapaambit sa templo isa ka representasyon kag ginatun-an paagi sa Espiritu. Nagakahulugan ini nga kita ginatud-loan gikan sa kahitaasan. . . . Ang aton paghangop sang kahulugan sang mga ordinansa kag mga

kasugtanan magadugang pa gid sa masami naton nga pagbalik sa templo upod ang panimuot sa pagtuon kag sa paghunahuna sang ginatudlo nga mga kamatuoran nga wala'y dulonan. . . . Ikalipay naton ang espiritual nga kabakod kag ang rebelasyon nga aton ginabaton

samtang nagatambong kita sa templo sing regular.”⁴

Silvia H. Allred, unang manuglaygay sa pangkabiligan nga panguluhan sang Relief Society.

MGA TANDA

1. “Personal Revelation: The Teachings and Examples of the Prophets,” *Liahona*, Nob. 2007, 88.

2. “Personal Revelation: The Gift, the Test, and the Promise,” *Ensign*, Nob. 1994, 59–60.
3. “Eight Reasons for Revelation,” *Liahona*, Sept. 2004, 8.
4. “Holy Temples, Sacred Covenants,” *Liahona*, Nob. 2008, 113, 114.

© 2009 iya sang Intellectual Reserve, Inc. Tanan nga kinamatarong ginauhuptan. Ginbalhag sa Pilipinas. Petsa sang pagtugot sa Ingles: 6/09. Petsa sang pagtugot sa paglubad: 6/09. Linubad sang *Visiting Teaching Message, April 2010*. Hiligaynon. 09364 861